

占察輪相第四

懺悔之法，雖則普為眾生發露眾罪，然當人無始業習，各有偏強，是故經中先說占初輪相，然後明懺悔法。今欲脩懺悔者，既已嚴淨道場，宜於未建首前，各占輪相。檢察善惡，何罪偏重，應的悔之，於脩懺時，庶便陳白。

占法別附於後

正脩懺法第五

准經自列，亦具十科。

第一嚴淨道場

經云；欲脩懺悔者，當住靜處，隨力所能，莊嚴一室。內置佛事，及安經法，懸繒幡蓋，求集香華以脩供養。

第二清淨三業

經云：澡浴身體，及洗衣服，勿令臭穢。准諸行法，每至穢處，必須更觸衣，旋轉既訖，洗浴清淨，還著淨衣。縱一日都不至穢，亦須一浴。終竟一期，或七日，或二七，三七，乃至千日，以得三業純善輪相為期。於中專莫雜語，及一切接對問訊，或有所需，但可直索，不得因事牽發餘語。連秉一心，念所脩法，不得剎那，念世雜事。當思生死事大，無常迅速，堅精努力，乃克有濟。倘稍違淨法，則唐喪劬勞，不可不慎。

第三香花供養

行者初入道場，至法座前，敷具正身，合掌倚立，應先緣念：一切三寶，體常遍滿，無所不在。眾生迷惑，流轉可哀。我為眾生翻迷歸悟，禮敬三寶。作是念已，唱言：

一切恭敬